

四庫全書

子部

欽定四庫全書

子部

全芳備祖前集卷二十三

詳校官中書_臣竇汝翼

主事_臣祁韻士覆勘

總校官庶吉士_臣朱 鈐

校對官助教_臣卜維吉

謄錄監生_臣陸潮愈

欽定四庫全書

全芳備祖前集卷二十一 宋 陳景沂 撰

花部

水仙花

事實祖

紀要

馮夷華陰槿鄉隄首人服水仙八石為水仙

清冷傳

江妃二女

游於江漢之濱逢鄭交甫解佩以與之

劉向列仙傳

杭州西

湖上有水仙王廟

坡詩注

雜著

世以水仙為金瑣銀臺蓋單葉者其中有一酒盞深黃而金色至千葉水仙其中花片捲皺密蹙一片之中下輕黃而上淡白如染一截者與酒盃之狀殊不相似安得以舊日俗名易之要之單葉者當命以舊名而千葉

者乃真水仙也

誠齋詩序

賦咏祖

五言散句

雪宮孤弄影水殿四無人

楊廷秀

天仙不行地且借水為名

至今寒花種清徹瑩心神

徐致中

薤葉秀且聳蘭香細而幽

七言散句

姑射樓臺簇水仙

陳朝老

碧玉簪長生洞府黃金盃重壓銀臺

錢穆父

玉昆相倚帶仙風壁立春前萬卉空

鄭安晚

曉風洛浦凌波際夜月江皋解佩時

徐淵子

極知今歲無曹植稱得陳玄記洛神

僧船窓

弱水蓬萊歸不得梅花相與伴春寒

五言古詩

仙人湘色裹縞衣以褕之青曝紛要地獨立春風時吹

香洞庭暖弄影清晝遲寂寂離落陰亭亭與子期誰知

園中客能賦會真詩

陳簡齋

隆冬彫百卉江海屬孤芳如何蓬艾底亦有春風香紛
敷翠羽帔溫靚白玉相黃冠表獨立淡然水仙裝弱植
愧蘭蓀高標摧冰霜湘君謝遺襟漢水羞捐璫嗟彼世
俗人欲火焚衷腸徒知慕佳冶詎識懷真剛淒涼柏舟
誓惻愴終風章卓哉有遺烈千載不可忘

朱文公

江梅丈人行歲寒固天姿蠟梅微著色標致亦背時胡
然此柔嘉支本但自持乃以平地尺氣與松篁夷粹然
金玉相承以翠羽儀獨立萬槁中冰膠雪垂垂水仙誰

強名相宜未相知刻畫近脂粉而況山谷詩吾聞抱太
和未易形似窺當其自英華造物且霽威平生恨剛褊
未老齒髮衰掇花置膽瓶吾今得吾師

止齋

定州紅花甕塊石藝靈苗方苞茁水仙厥名為玉霄適
從閩越來綠綬擁翠條十花冒其顛一一振鷺翹粉蕤
間黃白清香從風飄回首天台山更識膽瓶蕉

許仲
企

五言古詩散聯

坐令簪一枝蛾眉淡初掃笑弄黃金盃連臺盤拗倒

曾文

清

贈以金琅玕捧以白玉人約體動芳氣妙與蘭茝紉

徐致

中

花仙凌波子乃有松柏心人情自棄忘不改玉與金

趙西

山

磬弟墮小白梅兄憐老蒼仲氏似白眉表表金玉相

徐月

溪

五言絕句

韻絕香仍絕花清月未清天仙不行地且借水為名

誠齋

開處誰為伴蕭然不可鄰雪宮孤弄影水殿四無人

清真處子面剛烈丈夫心翠帶拖雲舞金卮照雪斟苦

吟吟不得移入伯牙琴

林可山

如聞交珮解疑是浴妃來朔吹欺羅袖朝霜滋玉臺

僧船

窓

七言古詩

凌波仙子生塵襪波水盈盈步微月是誰招此斷腸魂

種作寒花寄愁絕含香體素欲傾城山礬是弟梅是兄
坐對真成被花惱出門一笑大江橫

山谷

七言古詩散聯

琴中此操淡而古花中此名清且高金盞銀臺天下俗
誰以奴僕命離騷

七言絕句

折送南園粟玉花併移香木到寒家何如持上玉宸殿

乞與官梅定等差

山谷
五首

錢塘昔聞水仙廟
荊州今見水仙花
暗香靜色撩詩句
宜在林逋處士家

得水能仙天與奇
寒香訝莫動冰肌
仙風道骨今誰有
淡掃蛾眉蓼一枝

借水開花自一奇
水沈為骨玉為肌
暗香已壓荼蘼倒
只此寒梅無好枝

淤泥已作白蓮藕
糞壤能開白玉花
可惜國香天不管
隨緣流落野人家

宮樣鵲黃綠蒂垂中州未省見仙姿只疑湘水綃機女

來伴清秋宋玉悲

張文潛

湘君遺恨付雲來雖墮塵埃不染埃疑是漢家涵德殿

金芝相伴玉芝開

陳圖南

早於桃李晚於梅冰雪肌膚姑射來明月寒霜中夜靜

素娥青女共徘徊

劉貢父

水中仙子米何處翠袖黃冠白玉英報道幽人被渠惱

著詩送與老難兄

瘴土風烟那有此只疑姑射是前身仙風道骨難消得

付與霜臺衣繡人

張子湖

淨色只應撩處士國香今不落民家江城望斷春消息
故遣詩人詠此花

江妃虛却蕊珠宮銀漢仙人謫此中偶赴月明波上戲

一身冰雪舞東風

誠齋
二首

額間拂煞御袍黃衣上偷將月姊香待倩東風作媒妁

西湖嫁與水仙王

金玉其相一兩花遐心空為爾興嗟山礬不用來修敬

只許江梅共一家

游寒巖
二首

黃瑤白壁綴幽花珍重高人為嘆嗟織女橫河溪月墮
盃槃狼籍水仙家

天然初不事鉛華此是無塵有韻花翠帶詎容縈俗客
金盃只合勸詩家

林下清風自一家稍親梅竹近蘭芽只緣羞與凡花伍
移植名園不肯花

瑤池來宴老仙家，醉倒風流萼綠華。
白玉斷筭金暈頂，

幻成痴絕女兒花。

豫章來
氏二首

花盟平日不曾寒，六月曝根高處安。
待得秋殘親手種，萬姬圍繞雪中看。

七言八句

薤葉葱根兩不差，重蕤風味獨清嘉。
薄操肪玉圍金鈿，細染鵝黃剝素紗。
臺錢元非千葉種，丰容要是小蓮花。

向來山谷相看日，知是他家是黨家。

誠齋
二首

生來體弱不禁風，匹似蘋花較小豐。
腦子濃熏衆香國，江妃寒損水晶宮。
銀臺金瑣談何俗，簪弟梅兄品未公。
寄語金華老仙伯，凌波仙子更凌空。

歲華搖落物蕭然，一種清芬絕可憐。
不許淤泥侵皓素，全憑風露發幽妍。
騷魂洒落沈湘客，玉色依稀捉月仙。
却笑涪翁太脂粉，謾將高雅匹婁娟。

劉後村

七言律詩散聯

矮叢傍砌小成陰，涼徹敷腴謝水沈。
細著鮮風扶弱幹，

賸將零露酌芳心
華裾冉冉低香綬
玉葉稜稜襯嫩金

北
砌

玉潤金寒窈窕身
翩翩翠袖挽青春
水晶宮裏成仙女

玉醉山中得道人
朔雪幾回埋不死
南州一出淨無塵

樸翁老矣誰同調
相對無言意轉清

葛天民

樂府祖

菩薩蠻

人人盡道黃葵淡
儂家解說黃葵艷
可喜萬般宜不勞

朱粉施 摘承金盞酒勸君千萬壽
擎作女真冠試伊
姣面看

高梧葉下秋光晚
珍叢化出黃金盞
還似去年時傍闌
三兩枝 人情須耐久
花面長依舊
莫學蜜蜂兒等閒
悠颺飛

相思一夜庭花發
窓前忽認生塵襪
曉起艷寒粧雪肌
生暗香 佳人纖手
摘手與花同色
挿髻有誰宜除非

潘玉兒

謝竹友

雲娥雪姊羞相倚，凌波共酌春風醉。
的皪玉壺寒，肯教

金瓊單。只疑雙蝶夢翠袖，和香擁香外。
有鴛鴦風流

烟水鄉

高竹屋

促拍醜奴兒

清露濕幽香，想瑤臺無語淒涼。
飄然欲去，依然如夢雪

渡銀潢。又是天風吹淡月，珮丁東攜手西廂。
泠泠玉

磬沈沈，素瑟舞遍霓裳

朱希真

朝中措

幽芳獨秀在山林不怕曉寒侵應笑錢塘蘇小語嬌終
帶吳音 乘槎歸去雲濤萬頃誰是知心寫向生綃屏
上蕭然伴我寒衾

曾
父

綠華居處渺雲深不受一塵侵細看宜州新句平生纔
是知音 凌波一去屏山夢斷誰最關心惟有青天碧
海知渠夜夜孤衾

賀新郎

雲臥衣裳冷看蕭然風前月下水邊幽影羅襪塵生凌

波步湯沐烟波萬頃愛一點嬌黃成暈不記相逢曾解
珮甚多情為我香成陣待和淚搵殘粉靈均千古懷
沙恨恨當時匆匆忘把此花題品烟雨淒迷僂僂損翠
袖遥遥誰整漫寫入瑤琴幽憤絃斷招魂無人賦但金
枝的皪銀臺潤愁殢酒又還醒

辛稼
軒

金人捧露盤

夢湘雲吟湘月弔湘靈有誰見羅襪塵生凌波步穩背
人羞整六銖輕娉娉裊裊暈姦黃玉色輕明香心靜

波心冷琴心怨客心驚怕珮解却返瑤京杯擎清露醉
春蘭交與梅兄蒼烟萬頃斷腸是雪冷江清

高賓王

減字木蘭花

景陽樓上鐘聲曉半面啼粧勻未了殘月紛紛斜影幽
香暗斷魂玉顏應在昭陽殿却向前村深夜見冰雪
肌膚還有斑斑雪點無

天仙子

白玉為臺金作盞香是江梅名閨苑年年把酒對君歌

歌不斷盃無笑花月當樓人意滿
翹戴一枝蟬影亂

樂事且隨人意換西橋回首月明中
花已綻人何遠可

惜國香天不管

馬莊父

南柯子

翠袖熏龍腦烏雲映玉臺
春蔥一簇屬金杯曾記西樓
同醉角聲催
嫋嫋凌波淺深深步月來
隔紗微笑恐
郎猜素艷濃香依舊去年開

金盞子

得水能仙向漢皋遺佩碧波涵月藍玉煖生烟稱縞袂
黃冠素姿冰潔亭亭獨步立風前奈香多愁絕當時事
琴心妙處雖傳有誰堪說歲晚香無人更短景繁雲
天欲雪瀟湘烟水茫茫但萬里相思寒江空濶殷勤折
向梅邊聽玉龍吹徹丁寧道百年兄弟相看晚節趙雲齋
搗練子

心自小玉釵頭月娥飛下白蘋洲水仙月下遊江漢
洞庭舟香名薄倖寄青樓問何如打拍浮李方舟

卜算子

佩解浴波遙絃冷湘江渺月底盈盈誤不歸獨立風塵
表窓綺護幽妍瓶玉扶輕裊到後知誰語素心寂寂

山寒峭

廬直院

山礬花

事實祖

碎錄

山礬一名鄭花一名七里香

稌志

紀要

江南野中有一種小白花木高數尺春開極香野人謂之鄭花王荊公嘗欲作詩而陋其名予請名曰山礬花人採鄭花葉以染黃不借礬而成色也故名山礬海岸孤絕處補陀落伽山譯者謂小白花山疑即此花爾不然何以觀音老人端坐不去耶

山谷詩序

賦咏祖

七言散句

金
山
卷二十一
山礬是弟梅是兄

山谷

可惜不當梅蕊破幽香合在弟兄間

魯文清

七言古詩

秋風刻轂驚黃染七里尋香不辭遠荒溪日暮下牛羊
滿路幽香誰挂眼世間草木久紛然妖紅嫵綠徒爭先
何當伴君過一世細看四面秋香懸

張東窓

黃龍山中春事晚山谷道人上山坂鼻端山礬花氣濃
怪底經行衆芳苑一種風姿極可人幽姿正色相鮮新

素馨藉甚不足意黃淡羞澁終非真

清非道士

七言絕句

北嶺山礬取意閒輕風正用此時來平生習氣難料理

愛著幽香未擬回

山谷二首

高節亭邊竹已空山礬獨自倚春風二三名士開顏笑
把斷山光水不通

春冰薄壓枝柯倒分與清香見月娥忽是雪天深澗底

老松擎出白婆娑

王元之

青雲葉底雪花繁只與田家插髻鬟不枉涪翁初著句

能令大士久開顏

曾文清

一樹山礬宮樣粧曉風微送雨中香鼻端空寂誰知許

莫怪雄蜂取次狂

謝幼槃

漫山白蕊殿春華多貯清香野老家頻向風前招蛺使

密通家籍省梅花

張李靈

折來隨意插銅壺能白能香雪不如比似梅花輸一著

枝肥葉密欠清癯

鄒良山

只有江梅合是兄水仙終似號夫人季方政爾難為弟

每恨詩評未逼真

方秋崖

玲瓏葉底雪花寒清晝香薰草木間移植小軒供宴坐

恍疑身在普陀山

祝和父

樂府祖

南柯子

細葉黃金嫩繁花白雪香共誰連壁向河陽自是不須

湯餅試何郎
婀娜璚瓏髻輕盈淡薄粧莫令韓壽在

伊旁便逐游蜂驚蛇過東牆徐師

全芳備祖前集卷二十一

欽定四庫全書

全芳備祖前集卷二十二 宋 陳景沂 撰

花部

瑞香花

事實祖

碎錄

瑞香花紫而香烈非羣芳之比其始蓋出於廬山之中

廬山

志

紀要

成都志瑞香芳草也其本高纔數尺生山坡間花如丁香而有黃紫二種冬春之交其花始發植之庭檻則芬馥出於戶外野人不以為貴宋景公亦闕而不載予令春城後二十年守成都公庭僧園靡不有也予恐其沒於草一日見知於時殆與人事无異感而圖之為之序

呂大防瑞香圖序

賦咏祖

五言散句

結為楚臣佩散亂天女襟

東坡

著葉團青蓋開花炷寶薰

韓子蒼

紫袖染難透瓊膚洒轉香

誠齋

七言散句

此花清絕更纖濃

東坡

玉英金寶碧琳枝

陶弼

粉面固宜垂紫袖錦裳何必著中軍

周益公

齊開忽作藥枝錦未折猶疑紫素馨

誠齋

檻中紫艷纔盈握天上花香暗襲人

張芸叟

風雨離披枝葉瘦可憐終不減清香

曾文昭

世人競重薰籠錦子素何曾怯瑞香

王梅溪

便覺麝囊無遠韻頻挑蟻蠹有新芽

劉後村

宣和殿裏春風早紅錦熏籠二月時

陳子高

濛濛清露濯幽葩醉質爛斑襯曉霞

山家安得瑞龍腦春事不專紅鶴翎

方秋崖

長時不熟沈檀炷連月如薰腦麝香

三阮倡和集

曉露染成雞舌紫東風吹作麝臍香

陳古淵

五言古詩

幽香結成紫來自孤雲岑骨香不自知色淺意殊深移
栽青蓮宇遂冠簷菊林結為楚臣佩散落天女襟君持
風霜節耳聽笑歌音一逢蘭蕙質稍回鐵石心置酒要
妍暖養花須晏陰及此陰晴間恐致慳嗇霖綵雲知易
散鵲鳩憂先吟明朝便陳迹就著丹青臨

東坡次曹子方咏瑞香

五言古詩散聯

芳蕤何倩綯尤物真旖旎五葉映雕闌三楹駢粉蕊妍

分春月魂香徹肌骨髓

蘇雙溪

香密綴紅糝寶薰幕宮羅幽窓小團圞微風自婆娑

陳子

高

衆妙與春競紛紛持所長此花最幽遠如以禮自將猗

蘭敢回步簷蔔亦退藏

熱隱居士

五言絕句

真是花中瑞本朝名始聞江南一夢後天下遇清芬

王梅

溪

五言八句

得地秋根遠交柯繞指柔露香濃結桂池影鬪蟠虬黛
葉輕雲綠金花笑菊秋如何南海外萬里隔炎州

錢起

外著明霞綺中裁淡玉紗森森千萬筍簇簇兩三花小

霽迎風喜輕寒索膜遮香中真上瑞蘭麝敢名家

誠齋

短短熏籠小團團錦帕圍浮陽烘酒思沈水著人衣茱

荆通家遠椒花具體微春愁渾瘦盡別有瘦中肥

七言絕句

織錦天孫矮作機紫茸翻作白花枝更將沈水濃薰却

日淡風微欲干時

楊廷秀

夜綴香窠添露華晝移翠斛覆窓紗將身扶起簾帷看

生怕簾帷挨著花

誠齋移瑞香花斛

廬阜當年春睡濃花名從此擅春功紫袍四迸呈鮮粉

如藝仙香透錦籠

白氏集

繁花簇粉烘晴日，
藹有濃香透暖風。
六曲闌干凝睇處，

錦籠爭似玉為籠。

詠白瑞香

粉面芳心碧玉裳，
持來宛作故山香。
征途不覺春如許，

更問蘭芽幾寸長。

鄭安晚

七言律詩

上苑天桃自作行，
劉郎栽後幾回芳。
厭從年少追新賞，

閒對宮花識舊香。
折贈佳人非泛洎，
好紉幽佩弔沈湘。

鶴林神女無消息，
為問何由去帝鄉。

東坡

侵雪開花雪不侵開時色淺不教深碧團圞樂裏筓成束

紫蓓蕾中香滿襟別派近傳廬阜頂孤芳元自洞庭心

詩人自有熏籠錦不用衣篝炷水沈

誠齋

近看丁香萬粒攢遠看却與紫毬般誰將玉胆薔薇水

新濯瓊膚錦繡禪淨界薰修爾芬馥無人剪剔自檀欒

下元前至上元後省得龍沈與麝蘭

誠齋

針來大筍束仍攢作麼開時色兩般筍令金爐炷沈水

昭容紫袖襯中裨同花異葉枝枝別一種千枝節節樂

雪裏寒香得三友溪邊梅與雪邊蘭

誠齋

玲瓏巧感紫羅裳合得東君著意粧帶露欲開宜暖日

臨風微困怯春霜發揮文字來廬阜彈壓芳芬入醉鄉

最是午窻初睡醒熏籠贏得夢魂香

真朱淑

一樹婆娑整復斜使君輒贈到田家自慚甕牖繩樞子

不稱香囊錦傘花小借煖風為破萼旋澆秋水待抽芽

丁寧男子勤封植留與甘棠一樣誇

劉後村謝太守送瑞香花

樂府祖

西江月

公子眼花亂發，老夫鼻觀先通。
領巾飄下瑞香風，驚起謫仙春夢。
后土祠中玉蕊，蓬萊殿後鞦韆。
紅此花清絕，更纖穠，把酒何人心動。
東坡

剪就碧雲鬢，蕊刻成紫玉芳心。
淺春不怕峭寒侵，煖徹熏籠瑞錦。
花裏清芬獨步，尊前勝韻難禁。
飛香直到

玉杯深，消得厭厭痛飲。

張材甫

浣溪沙

臘後春前別一般梅花枯淡水仙寒翠雲裏著紫霞冠
妙品只今推第一寶花元不是人間為君更酌小龍

團

張子
湖

點絳脣

護雨烘晴紫雲縹緲來深院晚寒誰見紅杏梢頭怨

絕代佳人萬里沈香殿光風轉夢餘千片猶恨相逢淺

趙

德

莊

開檻陰沈紫雲呈瑞餘寒凜捲簾歌枕香逼幽人寢

入夢何年廬阜聞名稔風流甚阿誰題品喚作薰籠錦

王梅

溪

水龍吟

當年睡裏開阿誰喚作花間瑞中飄沈水籠熏古錦香
擁青綾被初日酣晴和風送暖十分清致掩窓綃待得
香融酒醒儘消受這春思縱把萬紅排比想較伊更

爭些子詩仙老子春風妙筆要題教似十里揚州三生
杜牧可曾知此趁紫唇微綻芳心半透與騷人醉

方秋
生

簷蔔花

事實祖

碎錄

一名梔子一名木丹一名越桃

本草

簷蔔梔子花也與雪

皆六出

坡詩注

凡草木花五出而簷蔔六出

韓詩外傳

諸花少

六出者惟梔子六出陶貞白曰即簷蔔花是也

酉陽雜俎如

人入簷蔔林中間簷蔔香不聞他香

佛書

樓石山多梔子

名山志

望氣占人家黃氣者梔子樹也

境地圖

紀要

漢有梔萸園

漢書

晉有華林園種梔子

晉書

晉令諸宮有秋

梔子守護者置吏一人

同上

蜀有紅梔花其形六出孟知

祥召百官於芳林園賞之

萬花谷

禠著

林蘭近雪而揚猗

注

林蘭梔子也

謝靈運賦

賦咏祖

五言散句

梔子艷色殊

少陵

色疑瓊倚樹香似玉京來

劉夢得

七言散句

桃蹊李徑年雖古 梔子紅椒艷復殊

少陵

六花蓓蘂林間佛 九節菖蒲石上仙

東坡

五言古詩

有美當階木 霜露未能移 金黃發香米 映日以離離 幸
賴夕陽下 餘景及西枝 還思照綠水 君惜無曲墀 餘榮

未能已晚實猶見奇復留傾筐德君恩信未貲

謝眺

林蘭擅孤芳性與凡木異不受雪霰侵自足中和氣欲

知清淨身即此林間是

魯文昭

舉世多植藥而我學種梔顏色固不別良楮誠異宜團

藥綠堦下豈畏秋風吹同心誰可贈為詠昔人詩

梅賾俞

五言古詩散聯

素華偏可喜的的半臨池疑為霜裏葉復道雪封枝日

斜光隱見風旋影合離

梁簡文帝

濯雨時攜素當颺獨含芬豐榮殊未紀銷落竟誰聞

宋顏

五言絕句

禪友何時到遠從毗舍園妙香通鼻觀應悟佛根源

王梅

溪

五言八句

梔子比衆木人間誠未多於身色有用與道氣俱和紅
取風霜實青看雨露柯無情移得汝貴在映江波

少陵

樹恰人來短花時雪樣看孤姿妍外淨幽馥暑中寒有
朶蓂瓶子無風忽鼻端如何山谷老只為賦山礬誠齋

五言律詩散聯

一花分六出十葉是重臺玉潔渾無玷金黃謾奪胎

北澗

七言絕句

何處飛來薜蘿林老枝樛屈更蕭森淒涼杜老江頭坐

又對行吟得自箴

朱文公

一根曾寄小峰巒薜蘿香清水影寒玉質自然無暑意

更宜移就月中看

朱淑真

清淨法身如雪瑩肯來林下見孤芳樹花六月無炎暑

省藝銅匱幾炷香

蔣梅叟

蒼筤標名自寶坊薰風開徧一庭霜閒來掃地跏趺坐

受用此花無盡香

楊巽齋

未說司花刻玉工已知名與佛相同可憐結了薰風子

依舊身歸色界中

潘鄭臺

樂府祖

風入松

芳叢簇簇水濱生，勾引午風清。六花大似天邊雪，又幾時雪有三層明艷。射回峰翅，淨香熏透，蟬聲晚簷人共月同行。疎影動銀屏，指尖輕撚都如玉。聽畫闌高轉，流鶯道是花枝，比得不成花也。多情

張約齋

點絳脣

毗舍遙遙異香一炷，馳名久妙。香稀有鼻觀深參透。問訊東來知誰先後，稱仙友。千花為偶。近有江西守

王梅

溪花
名妙香

最高樓

花解笑冷淡不求知長是殿裏芳時鮮鮮秀頸磋圓玉
洛陽翠佩剪琉璃向人前迎茉莉送荼蘼幾欲把清
香換春色費多少黃金甯不得梅雨妬麥風欺細腰空
戀當時蕊同心猶結舊年枝謝家娘將遠寄待憑誰
馬古

洲

全芳備祖前集卷二十二

欽定四庫全書

全芳備祖前集卷二十三 宋 陳景沂 撰

花部

蘭花

事實祖

碎錄

蘭香草也

說文

蘭與澤蘭相似生水旁紫莖赤節綠葉光

潤

本草

同心之言其臭如蘭

易繫

五月五日以蘭湯沐浴

大戴

記婦人或賜之蒹蒹則受獻諸舅姑

禮記

佩帨蒹蒹

內民則

之好我芳若樹蘭

荀子

蒹蒹草也生下濕地麻葉而方莖

赤花而黑實即零陵香也

本草

蒹草零陵香也唐人但名

鈴子香取其花倒懸如鈴也

郡志

古所謂蒹乃今之零陵

香今之蒹不知起於何時也

朱文公

蒹花詩注

紀要

鄭文公有賤妾曰燕姑夢天使與已蘭曰余為伯儵而祖也以是為而予以蘭有國香人服媚之文公與之蘭

而御之辭曰妾不才幸而有子將不信敢徵蘭乎公曰諾

生穆公名之曰蘭

左傳

鄭國之俗上已於溱洧兩水上執

蘭招魂祓除不祥

韓詩

漢尚書郎含香握蘭

官儀

先主殺張

裕諸葛亮救之帝曰芳蘭當門不得不鋤

蜀志

謝安嘗謂

諸子弟曰子弟何預人事答曰譬如芝蘭玉樹欲其生

於庭堦云

晉書

龍朔年改秘書省曰蘭臺秘書郎曰省郎

唐書 幸新豐賜李泌湯池給香粉蘭澤

德宗紀

霍定與友生

遊曲江以千金求人竊貴侯亭榭園中蘭花挿帽兼自

持往羅綺叢中賣之士女爭買拋擲金錢

曲江春宴錄

蕙草

綠葉而紫花魏武帝以為香燒之

廣志

王維貯蘭蕙以黃

磁斗養以綺石累年彌盛

汗漫錄

雜著

芝蘭生於深林不以無人而不芳君子修道立德不以

困窮而改節

家語

孔子曰與善人居如入芝蘭之室久而

不聞其香與之俱化矣與不善人居如入鮑魚之肆久

而不聞其臭亦與之俱化矣

家語

是故日月欲明浮雲蓋

之叢蘭秀發秋風敗之

文子

蘭芷不為莫服而不芳君

子行道不為莫知而止

國語

紉秋蘭以為佩

秋蘭兮麝

蕪羅生兮堂下綠葉兮素枝芳菲兮襲予

秋蘭兮青

青綠葉兮紫莖

蘭芷變而不芳

戶服艾以盈腰兮

謂幽蘭其不可佩

浴蘭湯兮沐芳澤

沅有芷兮澧

有蘭懷蘭英兮把瓊若

並楚詞

蘭有秀兮菊有芳懷佳

人兮不能忘

漢武帝秋風辭

循彼南陔言采其蘭

注

以為佩也

東晉補亡詩

爰有奇特之草產乎空崖之地仰鳥路而裁道

視行踪而莫企擬自然之高芬豈衆情之服媚寧紉結

之可求非延佇之能泊稟造化而均育與卉木而齊致

入坦道而銷聲屏幽山而靜異獨見識於琴臺及逢知

於綺季

陳周宏賦

紫莖丹花

左思賦

歲蕤兮紅芳

李白集

蘭以秋

芳

陸士衡

芳蘭在門不得不鋤

李德裕伐櫻桃賦

蘭以香自焚

漢

書

十步之內必有芳蘭

說苑

猗蘭操者孔子所作也孔子

聘諸侯莫能任自衛反魯隱谷之中見香蘭獨茂喟然

歎曰夫蘭當為王者香今乃獨茂與衆草為伍乃止車

援琴鼓之自傷不逢時託辭於蘭云蘭之猗猗揚揚其

香不採而佩於蘭何傷

韓琴操

蘭之猗猗窅窅其香遯世

無悶抱道深藏不以無人而遂廢其芳盤礴冰霜之際

虛徐蕭艾之場揭之揚之於古有光不採而佩於蘭無

傷豈膏黍之為用也必焚必割犀珠之畢通也必割必

絕雖佩玉而垂紳亦吐哺而握髮

李農父

蕙

余既滋蘭之九畹兮

畹畦也

又樹蕙之百畹

蘭芷變而

不芳兮荃蕙化而為茅 何昔日之芳草兮今直為此

蕭艾也

光風轉蕙汎崇蘭些

注

光風者雨止日出而

風也草木之有光也轉搖也汎搖動貌崇高也 豈惟

紉夫蕙茝

既替余以蕙纁兮又申之以攬茝 予恐

夫蕙華之層敷兮紛旖旎乎都房何曾華之無實兮從

風雨而飛颺以為君獨服此蕙兮嗟無異於衆芳

並楚詞

山谷以蘭似君子蕙似士大夫大槩山林十蕙而一蘭

也離騷云既滋蘭之九畹又樹蕙之百畝則知楚人賤

蕙而貴蘭矣蘭蕙叢生蘭時以砂石則茂灌以湯茗則芳是則同也至其一幹一花而香有餘者蘭也一幹至五七花而香不足者蕙也細葉為蘭濶葉為蕙

山谷記

蘭

蕙一物本草言之甚詳劉次莊云今沅澧所生花在春則黃不若秋紫之芬馥又黃魯直云一幹一花而香有餘者蘭一幹數花而香不足者蕙今按本草所言之蘭雖未之識然而云似澤蘭則今處處有之可類推矣蕙則自為零陵香猶不難識其與人家所種葉類茅而花

有兩種如黃說者皆不相似劉說則又詞不分明大抵古之所謂香草必其花葉皆香而燥濕不變故可刈而為佩若今之人所謂蘭蕙則其花雖香而葉乃無氣其香雖美而質弱易萎皆非可刈而佩者也

朱文公楚辭辨證

楚

詞所咏香草曰蘭曰蓀曰茝曰葍曰薜曰荃曰芷曰蕙曰薰曰麝蕪曰江離曰杜若曰杜衡曰揭車曰留夷釋者但一切謂之香草而已如蘭一物或以為都梁香或以為澤蘭或以為猗蘭草今當以澤蘭為正山中又有

一種如大葉門冬春開花則香此則名幽蘭非真蘭也
蓀則今人所謂石菖蒲者茝葍臨茝雖有四名止是一
物今所謂白芷是也蕙即零陵香一名薰藤蕪即芎藭
苗一名江蘼杜若即山薑也杜衡今人呼為馬蹄香惟
荃與揭車留夷終莫能識余他日當徧求其本列植闌
檻間以為楚香亭

遊齋
閒覽

賦咏祖

五言散句

秋蘭被幽崖

魏文帝

秋蘭被長坂

陳思王

握蘭勤徒結

謝靈運

秋蘭映玉墀

文選

清露被蘭皋

阮嗣宗

種蘭忌當門

袁淑

蘭槁不改芳

文粹

猗蘭奕葉光

少陵

紫蘭含幽色

韋左司

風蘭舞幽香

孟選

庭蘭紫芽茁

白香山

蘭秋香風遠

太白

芳蘭哀自焚

李太白

水光澤蘭葉

李賀

流馨馥秋蘭

潘正叔

歸雁映蘭時

寒蘭流水曲

歐陽修

佩蘭思潔身

蕙草流芳根

李太白

寄君青蘭花惠好遮不絕

太白

光華童子佩柔軟美人心

劉夢得

春蘭抱幽姿無意生蒿艾

魯文昭

楚人歌紫蘭華葉無傳久

司馬溫公

苗分鄭七穆香發謝諸郎

陳止齋

靜叅時有得習處却無聞

趙汝談

雖為通國寶而有出塵心

七言散句

蘭生谷底人不鋤

李白

烟開蘭葉香風暖

蘭在幽林亦自芳

劉夢得

光風催蘭吹小殿

李賀

更許光風為汎香

張文潛

荒郊深處有芳蘭

王逢

從來託跡喜深林

參寥

曾伴靈均賦楚騷

說道中心比芳草不知讒舌起椒蘭

晏元獻

療疴炎帝與書功紉佩楚臣空有意

梅聖俞

燕姑夢中惟是見謝家庭戶本來多

文潞公

深林幽寂秋雨晦叢蘭猗猗無所佩

劉原父

江海久無騷客賦一枝正可薦靈均

參寥子

葉侵海氣三分瘠花比家山一樣香

潘子岩

清潤潘郎玉不如中庭蕙草雪消初

楊巨源

靈均九畹應無比福地三茅浪自誇

楊東山

國香不欲論家譜合姓孫枝作鄭花

鄭安晚

靈均去後無人佩修郭亭空絕賞音

僧船窓

五言古詩

靈芝生河洲動搖因洪波秋蘭榮亦晚嚴霜悴其柯哀

哉二芳草不植泰山阿

後漢
鄭玄

蕙草生山北託身失所依植根陰崖側夙夜懼危顛寒

泉浸我根淒風常徘徊三光照八極獨不蒙餘暉

蘭生不當戶別是閒庭草風被霜雪欺紅榮已先老謬

接瑤華枝結根君王池顧無馨香美叨沐春風吹臨風

若可佩卒歲長相隨

青蓮

孤蘭生幽園衆草共蕪沒雖照陽春暉復悲高秋日
漸瀝飛霜早綠艷恐休歇若無清風吹香氣為誰發

春蘭如美人不採羞自獻時聞風露香蓬艾深不見丹

青寫真色欲補離騷傳對之如靈均冠佩不敢蕪

東坡

秋至百草晦寂寞寒露滋蘭皋一以悴無穢不能治端

居念離索無以遺所思願言托孤根歲晏以為期

朱文公

幽獨塵事屏晚晚秋蘭滋芳馨不自媚掩抑空相思晤

對日方永披叢露未晞條然發孤詠九畹陳悲詩

朱文公

幽人非愛山出山將何之居常種蘭蕙歲寒久當知初

藝止百畝餘地惜奚為先生無廣居千岩一茅茨四面

止藝蕙中間纔置錐綠紛宿叢修紫濯幼枝孤幹八

九花一花破初綻西風淡無味微度成香吹燈夢得幽

馥月寓傳靜姿我欲掇芳英和露充晨炊眷戀惻不忍
環玩自忘饑豈無衆花草不願秋風遲種時亂不擇歲

晚悔可追

誠齋

藝蘭當九畹蘭生香滿路紉君身上衣光明奪綠素孤

芳一衰歇彫零濕秋露佩服得君子亦足慰遲暮

周竹坡

五言古詩散聯

秋蘭陰玉池池水清且芳雙魚自踴躍兩鳥時回翔

傅玄

楚客重蘭蓀遺芳今未歇葉柔清淺水花點暄妍節紫

艷映渠鮮輕香含露潔

李衛公

根移地因偏花老色未改意蘇瘴霧餘氣壓初寒外婆

娑靖節髭髻靈均佩

王右丞

五言絕句

藝植日繁滋芬芳時入座青蔥春如濯皎潔秋英墮

溫公

昔人慕猗蘭佩服比修潔往往卒歲間山中行採掇

蔡家

健碧續續葉斑紅淺淺芳幽香空自秘風骨秘幽香

誠齋

今花得古名猗旒香更好適意欲忘言塵編詎能考

朱文

公

蘭居地之陰藹藹含華滋此本不以剛而為剛者師

葉水

心

五言律詩

蕙本蘭之族依然臭味同重為水仙佩相識楚詞中幻

色雖非實真香亦竟空云何微起馥鼻觀已先通

東坡

秋蘭迤初馥芳意滿中襟想子空齋裏淒涼楚客心夕

風生遠思晨露洒中林頗意孤根在幽期得重尋

朱文公求

蘭

卷二十三

七言古詩散聯

陽崖月窟得芳叢滿握歸來誇所逢
淨掃幽徑植薜蘿
紫莖綠葉弄奇姿
疎簾風軟日華薄
芳馥滿懷君自知

寥參

七言絕句

謾種秋蘭四五莖
疎簾底事太關情
可能不作涼風計

護得幽香到晚清

朱文公

一朶俄生几紫光尚如逸士氣昂藏秋風試與平章看

何事當時林下香

趙虛齋

蕭艾榮枯各有意深藏芳潔欲奚為世間鼻孔無憑託

且伴幽窓讀楚詞

劉後村

寒谷初消雪半林紫花搖弄晝陰陰是誰曾見吹香處

千古春風楚客心

吳菊潭

七言八句

雪徑偷開淺碧花水根亂吐小紅芽生無桃李春風面

名可山林處士家故坐國香到朝市不容霜節老雲霞

江籬蕙圃非吾耦付與騷人定等差

楊廷秀

深林不語抱幽貞賴有微風遞遠馨開處何妨依薜砌
折來未肯戀金瓶孤高可挹供詩卷素淡堪教入畫屏

莫笑門無佳子弟數枝濯濯映陔庭

劉後村
二首

兩盆去歲共移來一置雕闌一委苔我折扶持令葉瘦
君能調護遣花開隸人挑蠹翅千匝稚子澆泉走幾回
亦欲效顰芸小圃地荒終恐費栽培

樂府祖

醉花陰


輕紅蔓引絲多少
剪青蘭葉巧人向月中歸
留下星鈿
彈破真珠小
等閒不管春知多
著繡簾圍繞
只恐被東風偷得餘香也
分付著閒花草

仲殊

浣溪沙

楚客才華為發揚
深林著意不相忘
夢成燕國正芬芳
莫把品名閒議擬
且看青鳳羽毛長
十分領取面前

香仲殊



全芳備祖前集卷二十三

欽定四庫全書

子部

全芳備祖前集卷二十七

四至

詳校官中書_臣竇汝翼

主事_臣祁韻士覆勘

總校官庶吉士_臣朱 鈐

校對官助教_臣卜維吉

謄錄監生_臣陸潮愈

欽定四庫全書

全芳備祖前集卷二十四
宋 陳景沂 撰

花部

櫻桃花

事實祖

碎錄

一名含桃見櫻桃實注

紀要

晉式乾殿前櫻桃二株含章殿前一株華林園二百七

十株

晉宮
閣志

雜著

古人有言芳蘭在門不得不鋤眷茲櫻之攸止亦在物
之宜除觀其體異修植材非棟榦外沈森以茂密中紛
錯而交亂先羣卉以放諂望嚴霜而彫換綴繁英而霰

集駢朱實以星燦譏林甫也

蕭穎士伐
櫻桃賦

賦咏祖

五言散句

紅藥滿雙枝

崔興宗

絢葉未開蕊紅葩已發光

王僧達

野棠開未落山櫻發欲然

沈約

人行已荒徑落花半枯槎

永叔

七言散句

背人不語向何處下堦自折櫻桃花

李長吉

風光莫占少年家白髮殷勤最戀花

李涉

別來幾春未還家玉窓五見櫻桃華

李太白

尋芳常恨見花遲豈意探花獨後時

永叔

病目試尋蜂蝶處櫻桃花發見清明

名賢拾遺

五言古詩

櫻桃千萬枝照耀如雪天王孫宴其下隔水凝神仙

劉禹

鈔

五言八句

皎日照芳菲鮮葩含素輝愁人惜春夜達曉想岩扉風

靜陰盈砌露濃香
人衣恨無金谷妓
為我奏思歸

李衛公

五言律詩散聯

偶因移曉雨似欲占春風
嫩葉藏輕綠繁葩露淺紅

文與

可

七言古詩散聯

晨暉照屋清露稀
櫻桃花房欲開齊
繁華無得造物巧

不與衆卉爭高低

劉原父

七言絕句

山櫻抱石陰松枝比並餘花發最遲賴有春風嫌寂寞

吹香度水報人知

王文公

櫻桃花發滿晴柯不賭嬌嬈只賭多落盡江梅餘半朵

依然風韻合還他

楊廷秀

樂府祖

採桑子

櫻桃謝了梨花發紅白相催燕子歸來幾處風簾繡戶
開人生樂事知多少且酌金杯管咽絲哀漫引蕭娘

舞袖回

晏叔原

浣溪沙

小圃春光不待邀，早通消耗與含桃。晚來芳意半寒梢。
帶笑不言春淡淡，試粧未徧雨潇潇。東君少女可憐

嬌

毛澤民

石榴花

事實祖

碎錄

一名海榴凡花以海名皆自海外來

雜志漢張騫奉使西

域還得安石榴花係出塗林種

博物志

溫湯朝元閣七聖

殿遶殿石榴皆太真所植

洪氏雜志

崔元微遇數美人李氏

陶氏又緋衣少女曰石醋醋又有封家十八姨來石醋

醋曰諸女伴皆佳苑中每被惡風所撓常蒙十八姨相

庇處士每歲旦與作一朱旂圖日月五星則免矣崔許

之其日立旂東風刮地折木飛花而苑中花不動崔方

悟衆花之精封家姨乃風神也石醋醋乃石榴也

博異記

雜著

被綠葉於脩條綴朱華於弱幹豈金翠之足珍實茲葩
之可玩新莖擢潤膏葉垂腴丹臉綴於朱房綳的點乎

紅鬚

潘岳賦

風觸枝而翻蔕雨淋條而殖芬環青軒而燧

列繞翠波而星分

宋願氏賦

縹葉翠萼紅華絳采照列泉石

芬披山海

江淹頌

其在晨也灼若九日之栖扶桑其在夕

也爽若燭龍之吐潛光

傅玄賦

王荊公作內相時翰院中

有石榴一叢枝葉甚茂但只發一花故荊公題云濃綠

萬枝紅一點動人春色不須多予每以不見全篇為恨

遜齋閒覽以為唐人詩非也

王直方詩話

賦咏祖

五言散句

花宜插髮紅

溫岐

榴開帶酒紅

張說

鮮葩猩血染

楊文公

蠟珠攢作帶綳綵剪成叢

溫岐

葉翠如新剪花紅似舊裁

梁元帝

新枝含淺綠晚萼帶深紅

隋魏彦

畏日助殷紅過雨滌濃翠

溫公

都緣賦色淺遂不稱春繁

宋景文咏
淡紅榴花

七言散句

石榴花發滿溪津

李賀

風翻火艷欲燒天

香山

海榴紅綻錦窠新

元微之

胭脂新染薄羅裳

謝幼槃

紅繡誰家合羅袴

古詩

江上年年小雪遲年光獨教海榴知

李嘉運

薰風四月濃芳歇火玉燒枝拂露華

劉原父

安石榴花開最遲絳裙深樹出幽扉

東坡

日烘麗萼紅縈火雨過萑條綠噴烟

李迪

綠葉晚鶯啼處密紅房初日照時繁

永叔

春花開盡見深紅夏葉始繁明淺綠

梅聖俞

五言古詩

魯女東窓下海榴世所稀
珊瑚映綠水未足比光輝
清香隨風發落日好鳥歸
願為東枝低舉手拂羅衣
無由

共披折引領望金扉

李白

弱植不盈尺遠意駐蓬瀛
月寒空堦曙幽夢綵雲生
糞

壤擢珠樹莓苔插瓊英
芳根閔顏色徂歲為誰榮

柳柳州

炎洲氣序異十月榴始華
是誰初植此石罅抽根斜
綠陰蔽朝曦朱艷奪暮霞
始猶一二枝俄已千百葩
染人不能就畫史無以加
洛陽擅牡丹久矣埋胡沙
蜀州誇

海棠邈然隔夔巴安知籬壁間亦有尤物耶坐令農圃
室化為金張家詩人好摹擬凍蕊并寒槎斯篇倘令見

無乃譏吾奢

劉後村

庭前安榴樹花稀更可憐青旌擁絳節伴我作神仙遲
日耿不暮微陰眩彌鮮一樽兼百慮心賞覺悠然

陳簡齋

五言古詩散聯

靈園同嘉稱幽山有奇質停采久彌鮮含華豈期實長
願微名隱無使孤株出

沈休文

塗林未應發春暮轉相催
燃燈疑夜火連株勝蚤梅

梁元

五言絕句

荷葉參差捲榴花次第開
但令心有賞歲月任渠催

荆公

窈窕安榴花乃是西隣樹
墜萼可憐人風吹入幽戶

朱文

公

五言排律

何言安石國萬里貢榴花
迢遞河源遠因依漢使槎
酸

辛犯葱嶺憔悴涉龍沙初到標珍木多來比亂麻深栽
故園裏少種貴人家惟我荊州見憐君胡地賒元鎮

春去花隨盡紅榴暖欲燃後時何所恨處獨不祈憐葉
葉自相偶重重久更鮮流珠沾暑雨改色淡朝烟著子
專寒酒移根擅化權愧非無價手刻畫竟難傳陳無已

五言律律散聯

綠葉栽烟翠紅英動日華新簾裾透影疎牖燭籠紗委
作金爐焰飄成玉砌瑕乍驚珠綴密終悞繡幃奢琥珀

烘梳碎胭脂頰嫩搽風翻一林火電轉五雲車絳帳迎
霄日芙蓉綻蚤芽淺深俱隱映前後各分葩宿露低蓮
臉朝光借綺霞暗紅徒激繞濯錦莫周遮俗態能嫌舊
芳姿尚可嘉

微之

七言古詩

紅榴雙葉元自雙誰能一朝使渠隻如何陳張刎頸交
借兵相忌不餘力有情著物指死爭誰知有情而無情

山谷

七言絕句

五月榴花照眼明，枝間時見子初成。
可憐此地無車馬，

顛倒青苔落絳英。

韓文公

幾年封植愛芳叢，韶艷朱顏竟不同。
從此休論上春事，

待成古木看衰翁。

柳子厚

蹙蹙生紅露滴珠，薰風深愧曉粧初。
折來戴朵頻拈看，

應訝羅裙色不如。

武朝宗

似火山榴映小山，繁中能薄艷中閒。
一朶佳人玉釵上，

祇疑燒却碧雲鬟

杜牧之

五月榴花忽見春
白頭還喜一番新
可能略不解春意

只有尋花問葉人

陳後山

待闌南風欲炷香
東風打併往西堂
石榴已看乾紅蕾

却問春歸有底忙

誠齋

舊羅綉薄剪薰風
已自開花蒂亦同
不肯染時輕著色

却將密綠護深紅

七言八句

一叢千朵壓闌干，剪碎紅綃却作團。風裊舞腰香不盡，
露銷頰頰淚成乾。薔薇帶刺攀常懶，菡萏生泥玩亦難。
不比此花簷戶下，任人扳折任人看。

解文公

樂府祖

梁州令

翠樹芳條颭灼灼，裙腰初染佳人攜。手弄芳菲綠陰紅，
影方展雙紋簾。插花照影窺鸞鑑，只恐芳容減不堪。

零落春晚青苔雨，後深紅點

永叔

賀新郎

乳燕飛華屋。悄無人、桐陰轉午，晚涼新浴。手弄生綃白
團扇，扇手一時似玉。漸因倚、孤眠清熟。簾外誰來推繡
戶。枉教人夢斷。瑤臺曲。又却是、風敲竹。石榴半吐紅
巾蹙。待浮花浪蕊都盡，伴君幽獨。穠艷一枝細看取，芳
心千重似束。又恐被、西風驚綠。若待得君來此，向花前
對酒，不忍將花觸。共粉淚、兩簌簌。
東坡

南歌子

紫陌尋春去紅塵拂面來無人
不道看花回惟見石榴新蕊一枝開
冰簟堆雲髻金樽灩玉醅綠陰青子莫
相催留取紅巾千點照池臺

阮郎歸

深庭邃館鎖清風榴花芳艷濃
陽光染就欲燒空誰能窺化工
觀物外喻聲中靈砂別有功
若將一粒比花容金丹色又紅

芙蓉花

事實祖

碎錄

產於陸者曰木芙蓉產於水者曰草芙蓉亦猶芍藥之

有草木也

草木記

唐人謂木芙蓉為木蓮

鶴山叢志

一名拒霜

其木叢生葉大而其花甚紅九月霜降時候開東坡為

易名曰拒霜

東坡集

紀要

孟後主於成都四十里羅城上種此花每至秋四十里

皆如錦繡高下相照因名曰錦城

成都記

慶厯中有一朝

士將曉赴朝見美女三十餘人靚粧麗服兩兩並馬而

行觀文丁度按轡於其後朝士驚曰丁素儉何姬之衆

耶有一人最後行朝士問曰觀文將宅眷何往曰非也

諸女御迎芙蓉館主耳俄聞丁卒

石林燕語

石曼卿去世後

其故人有見之者云我今為仙主芙蓉城欲呼故人共

遊不諾忿然騎一素驢而去

歐公歸田錄

東坡云九月十日

君猷置酒秋香亭有拒霜獨向君猷開坐客喜笑以為

非使君莫可當此故作詩詞以記之

詞集

賦咏祖

五言散句

託根地雖卑凌霜花亦茂

梅聖俞

麴塵輕抱蕊宮纈巧粧叢

宋景文

何人露秋纈不管著秋霜

文與可

霜樹不知醜葉與花爭紅

許棐

七言散句

芙蓉城中花冥冥

東坡

莫怕秋無伴醉物水蓮開後木蓮開

香山香

芙蓉生在秋江上肯向東風怨未開

高蟾

情知遙地風霜惡不肯將花占剩秋

宋景文

何事獨蒙青女力牆頭催放數苞紅

王禹玉

莫知何處忤青帝不使東風管領吹

百家吟

洛晚自憐窺露沼忍寒誰念倚霜籬

文與可

芙蓉雖與秋相似獨對層臺襯曉粧

湘山居士

且看小檻新花蕊，休泥他家晚菊叢。

山谷

霜花留得紅粧面，酌盡齋中竹葉瓶。

玄冥蹙迫三秋盡，青女催殘一夜空。

芙蓉牆外垂垂發，九月憑闌未怯風。

陳簡齋

舊時憶在延真館，玉作芙蓉院院明。

韓子蒼

風露商量借膏沐，胭脂深淺入肌膚。

楊廷秀

亂剪素羅粧一樹，略將幾朵蘸胭脂。

一帶拒霜三十里，又催簫鼓作秋聲。

徐竹隱

待教滿地妖紅落獨與秋風作主人

張俞

就中一種芙蓉別只恐鶯黃學道粧

戴石屏

五言古詩

有美不自蔽安能守孤根
盈盈西岸秋至風露繁
麗影別寒水穠芳委前軒
菱荷諒難雜及此生高原

初約山寺遊端為怪竒石
那知雲水鄉化作錦繡國
入門徑深深遇眼秋寂寂
隔竹小亭明稠紅漏疎碧
山僧引幽踐絕巘恣佳陟
三步綺為障十步霞作壁
四圍盡

芙蓉山僧所手植秋英例臞淡此花獨腴澤却憶補外
時朝士作祖席是間萬枝梅冷射千崖白舊遊不可尋

雪枝半榛棘

誠齋

五言古詩散聯

玉女襲朱裳重重映皓質晨霞耀丹景片片明秋日蘭
澤多衆芳妍姿不相匹

李衡公

芳菲能幾時顏色如自愛鮮鮮弄霜曉裊裊含風態蕙
蘭植秋香桃李姣春醉時節雖不同盛衰終一致莫笑

黃菊花籬根守憔悴

永叔

甚疑牡丹叢但病皮骨老不宜入水看只可隔水眺

李泰

伯

湖上野芙蓉含思秋脈脈娟娟如靜女不肯傍阡陌詩

人杳未來幽艷冷難宅

永叔

五言絕句

閒吟鮑照賦更起屈平愁莫引西風動紅衣不耐秋

陸龜

蒙

木末芙蓉花山中發紅萼澗戶寂無人紛紛開且落

王維

浩露侵相藥尖風獵絳英繁霜不可拒切勿受空名

宋景

文

深淺霜前後應同舊渚紅羣芳坐衰歇聊自舞秋風

石學

士

溪邊野芙蓉花水相媚好半看池蓮淨獨伴霜菊槁

永叔

紅芳曉露濃綠樹秋風冷共喜巧回春不妨閑弄影

染露金風裏宜霜玉水濱莫嫌開最晚元自不爭春

誠齋

江南江北樹秋至，僅成叢向晚誰爭艷。酡顏淺作紅，宋景

文

玉蕊迎秋露金房，落晚霞涉江從楚女採。菊聽陶家聖俞

芙蓉乃微木，晚艷獨嬌春。穠粹覺蘭瘦，芬敷知菊貧。張文

潛

五言八句

新開寒露叢，遠比水邊紅。艷色寧相妬，嘉名偶自同。採

江秋節晚，寒木古祠空。須勸勤來飲，無令便逐風。韓文公

拒霜花已吐吾宇不淒涼天地雖肅殺草木有芬芳道

人晏坐處侍女古時粧露濃濕丹臉西風吹綠裳

陳簡齋

孤芳託寒木一曉一番新春色不為主天香欲動人丹

楓見流落黃菊坐因循莫訝偏相愛衰遲似我身

陶淵

五言律詩散聯

霜深纔吐艷日暮更饒紅掩映殘荷浦憑陵敗菊叢

船窓

七言古詩

人間八月初霜嚴芙蓉溪上春酣酣二南變盡魯叟筆

七國破後鄉與談人間三月春風好溪上芙蓉跡如掃
周家盛處伯夷枯漢室隆時賈生老小兒造化幾能窮
幾回枯折還芳叢只應人老不復少有酒且發衰顏紅

唐子
西

七言古詩散聯

清霜夜墮秋荷敗翠蓋紅粧愁割愛碧條蒼葉生春妍

買斷秋光作容態

劉叔擬

七言絕句

水面芙蓉秋已衰繁條倒影看花時平生露滴乘紅臉

似有朝開暮落悲

李嘉運

翠幄臨流結絳囊多情長伴菊花芳誰憐冷落清秋後

能把華姿獨拒霜

劉理

種處雪消春始動開時霜落雁初過試栽金菊叢相近

織出新番蜀錦窠

永叔

水邊無數木芙蓉露滴胭脂色未濃正是美人初醉著

強擡清鏡晚粧慵

介甫

千林埽作一番黃只有芙蓉獨自芳
喚作拒霜知未稱

看來却是最宜霜

東坡

今年古寺摘芙蓉憔悴真成澤畔翁
聊把一枝閒照水

明年何處對霜紅

張文潛

蜀國芙蓉名二色重陽前後始盈枝
畫調粉筆分班處

繡引金針閒刺時

文與可

晚粧懶困曉粧新火急來看
趨嚮晨蛺蝶花枝欺我老

競將紅露滴烏巾

誠齋

湖上秋風起，權歌萬枝映。柳更依荷老，來不作繁華夢。

一樹池邊已覺多。

俊村

池上秋閒一兩叢，未妨冷淡伴詩翁。而今雖有看花處，不愛深紅愛淺紅。

曉粧如玉暮如霞，濃淡分秋染此花。終日獨醒千底事，

晚知爛醉是生涯。

劉圻父

紫茸排萼露微紅，不比春花對日烘。冷落半秋誰是侶，

可憐妖艷嫁西風。

陳龜峰

妖紅弄色絢池臺不作匆匆一夜開若遇春時占春榜

牡丹未必作花魁

胡松窓

四十里城花發時錦囊高下照坤維雖粧蜀國三千色

難入邠風七月詩

張立

七言八句

木蕖何似水芙蓉同個聲名各自都風露商量借膏沐

胭脂深淺入肌膚喚回春色秋光裏饒得紅粧翠蓋無

字曰拒霜深不可却愁霜重要人扶

誠齋

綠裳丹臉水芙蓉不謂佳名偶自同一朵方酣初日色
千枝應發去年叢莫驚墜露添新紫更待微霜暈淺紅
却笑牡丹猶淺俗但將濃艷醉春風

方秋
崖

樂府祖

少年遊

霜華滿樹蘭彫蕙慘秋艷入芙蓉胭脂嫩臉黃金輕蕊
猶自怨東風前歡往事當歌對酒無限到心中更憑
朱檻憶芳容腸斷一枝紅

晏元
獻

三臺令

魚藻池邊射鴨芙蓉苑裏看花日色赭黃相似不著紅
鸞扇遮池北池南水綠殿前殿後花紅天子千秋萬

歲未央明月清風

柳耆卿

卜算子

曉雨洗新粧艷色驚衰眼不趁東風取次開待得清霜
晚曲港照回流影亂微波淺作態低昂好自持江濶

烟村遠

葉石林

菩薩蠻

冰明玉潤天然色
芙蓉揜作西風客
不肯嫁東風
殷勤霜露中
綠窓梳洗晚
罰飲琉璃盞
斜日上粧臺
酒紅

和因來

范石湖

紅雲半壓秋波急
艷粧染露嬌
啼色佳夢入仙城
風流石曼卿
宮袍呼醉醒
休捲西風錦
明日粉香殘
六橋

烟水寒

高竹屋

全芳備祖前集卷二十四